

馬氏文獻通考

文獻通考卷一百六十五

鄴

陽

馬

端

臨

貴

興

著

刑考四

刑制

宋文帝時侍中蔡廓建議以爲鞠獄不宜令子孫下辭明言父祖之罪虧教傷情義莫此爲大自今但令家人與囚相見無乞獄之詞便足以明伏罪不須責家人下辭朝議咸以爲允從之

衛將軍王弘言主守偷五疋常偷四十疋並加大辟其法太重宜進主守偷五十疋死四十疋降以補兵既得小寬人命亦足以爲懲戒從之

明帝太始四年詔定黥刑之制有司奏自今凡刳竊執官伏拒戰邏司攻剽亭寺及傷害吏人并監司將吏自爲刳皆不限人數悉依舊制斬刑若遇赦黥及兩頰刳字斷去兩腳筋徙付交梁寧州五人以下止相通奪者亦依黥作刳字斷去兩腳筋徙付遠州若遇赦原斷徙猶黥面依舊補治士家口應及坐悉依舊結讞及帝崩其例乃寢

齊高祖時丹陽尹王僧虔上言郡縣獄相承有上湯殺囚名曰救疾實行冤暴豈有死生大命而潛制下邑愚謂囚病必先刺郡求職司與醫對共診驗遠縣家人省視然後處治上從之

武帝永明九年令刪定郎王植之集註張杜舊律合爲一書凡千五百三十條事未施行其文殄滅初晉張翼杜預共註律三十卷自泰始以來用之律文簡約或一章之中兩家所處生殺頓異臨時斟酌更得爲姦上留心

法令詔獄官詳正舊註七年尚書刪定郎王植乃集定二註表奏之詔公卿八座參議正竟陵王子良總其事衆議異同不能宜者制旨平決是歲書成廷尉山陰孔稚珪上表以爲律文雖定苟用失其平則法書徒明於表裏冤魂猶結於獄中竊尋古之名流多有法學今之士子莫肯爲業縱有習者世議所輕將恐此書永淪走吏之手矣今若直律助教依五經例國子生有欲讀者策試高第卽加擢用以補內外之官庶幾士流有所勸慕崔祖恩言漢時習律有官子孫並傳其業今廷尉律生乃令吏門戶刑之不措乃此之由詔從其請事竟不行

梁武帝制依周漢故事有罪者贖其科凡在官身犯罰金鞭杖督之罪悉入贖停罰其臺省令史士卒欲贖者聽之時齊時舊郎蔡法度能言齊王植之律於是使損益舊本以爲梁律天監初又令王亮等定爲二十篇一曰刑名二曰法例三曰盜劫四曰賊叛五曰詐僞六曰受賕七曰告劾八曰討捕九曰繫訊十曰斷獄十一曰雜十二曰戶十三曰擅興十四曰毀亡十五曰衛宮十六曰水火十七曰倉庫十八曰廩十九曰關市二十曰違定制刑爲十五等之差棄市以上爲死罪大罪梟其首次棄市刑二歲以上爲耐罪言各隨伎能而在使之也有髡鉗五歲刑笞一百收贖絹男子六十疋又有四歲刑男子四十八疋又有三歲刑男子三十六疋又有一歲刑男子二十四疋罰金一兩以上爲贖罪贖死者金二斤男子十六疋贖髡鉗五歲刑笞二百者金一斤十二兩男子十四疋贖四歲刑者金一斤八兩男子十二疋贖三歲刑者金一斤四兩男子十疋贖二歲金一斤男子八疋罰金十二兩者男子大疋罰金八兩者男子四疋罰金四兩者男子二疋罰金二兩者男子一疋罰金一兩男子二丈女子各半之五刑不簡正於五罰五罰不服正於五過以贖論故爲此十五等之制又九等之差有一歲半歲刑百日刑鞭杖一百鞭杖五十鞭杖四十鞭杖三十鞭杖二十鞭杖十又八等之差一曰免官加杖督一百二曰免官

三曰奪勞百日杖督一百四曰杖督一百五曰杖督五十六曰杖督四十七曰杖督二十八曰杖督十論加者上

就次當減者下就次凡繫獄者不卽答款應加測罰不得以人士爲隔若人士犯罰違捍不款宜測罰者先參議

牒啟然後科行斷食三日聽家人進粥二升女及老小百五十刻乃與粥滿千刻而止囚有械紐斗械及鉗並立

輕重大小之差而爲定制其鞭有制鞭法鞭常鞭凡三等之差制鞭生革廉成法鞭生革去廉常鞭熟鞭反之友不

去廉皆作鶴頭紐長尺二寸梢長二尺七寸廣三寸靶長尺五寸杖皆用生荆長六尺有大杖法杖小杖三等之

差大杖頭圍寸三分小頭八分半法杖圍寸二分小頭五分小杖圍寸一分小頭極杪諸督罰大罪無過五十三

十小者二十當笞二百以上者笞半餘半後決中分鞭杖老小於律令當行鞭杖罰者皆半之其應得法鞭杖以

熟韃鞭小杖過五十者稍行之將吏以上及女人應有罰者以罰金代之其以職員應罰及律令指名制罰者不

用此令其問事諸罰皆用熟韃鞭小杖其制鞭杖法杖法鞭自非特詔皆不得用詔鞭杖在京師者皆於雲龍

門行女子懷孕者勿得決罰其反叛大逆以上皆斬父子同產男無少長皆棄市母妻姊妹及應從坐棄市者妻

子女妾同補奚官爲奴婢資財沒官刳身皆斬妻子補兵遇赦降死贖面爲刳字贖音都髮鉗補治鎖士終身其

下又謫配財官治士尙方鎖士皆以輕重差其年數其重者或終身士人有禁錮之科亦以輕重爲差其犯清議

則終身不齒耐罪囚八十以上十歲以下及孕者盲者侏儒當械繫者及郡國太守相都尉關中侯以下亭侯以

上之父母妻子及所坐非死罪除名之罪二千石以上非檻徵者並訟繫之丹陽尹月一詣建康縣令三官參共

錄獄察斷枉直其尙書錄人之月者並與尙書參共錄之凡定罪二千五百二十九條又有令三十卷

天監十一年詔自今連譴之家及罪應質作若年有老小可停將送上敦睦九族優借朝士有犯罪者皆屈法申

之百姓有罪則案之如法其緣坐則老幼不免一人亡逃舉家質作民既窮窘姦宄益深嘗因郊祀有秣陵老人
遮車駕言曰陛下爲法急於黎庶緩於權貴非長久之道上乃思所以寬之

十四年制除贍面之刑 帝篤尙文雅疏簡刑法自公卿大臣不以鞠獄爲意姦吏柄權弄法賄賂成市枉濫者
多大率二歲刑以上歲至五千人徒居作者具五任其無任者著升械若疾病櫛解之是後囚徒或有優劇時王
侯子弟多驕淫不法上年老厭於萬幾又專精佛戒每斷重罪則終日不懌或謀反逆事覺亦泣而宥之由是王
侯益橫或白晝殺人於都街或暮夜公行剽掠有罪亡命匿於王家有司不敢搜捕上深知其弊而溺於慈愛不
能禁也

中大同元年詔自今犯罪非大逆父母祖父母勿坐自是禁網漸疏百姓安之而貴戚之家不法甚矣

陳武帝令尙書刪定鄧范杲參定律令又令徐陵等知其事制律三十卷科三十卷其制維重清議禁錮之科若
縉紳之族犯虧名教不孝及內亂者終身不齒先與人爲婚者許妻家奪之其獲賊帥士人惡逆雖經赦免死付
治聽將妻入役不爲年數又存贖罪之律復父母緣坐之刑自餘一用梁法其有贓贖昭然而不款伏則上測立
立測者以土爲孕高一尺生員劣容囚兩足立鞭二十笞三十訖著兩械及桎上塤一上測七刻日再上三七日
上測七日一行鞭凡經鞭杖合一百五十得度不承者免死其髡鞭五歲刑降死一等鑕三重其五歲刑下並鑕
一重五歲刑若有官準當二年餘並居作其三歲刑若有官準當二年餘一年贖若過誤罰金其二歲刑者若有
官者贖一歲刑無官亦贖論寒庶人準決鞭杖囚並著械徒並著鑕亦不計階品死罪將決乘露車著三械加羣
手至市脫手械及羣手焉

羣音拱兩手曰羣

當刑於市者夜須明雨須晴朔日八節大齋日月在張心日並不得行刑廷

尉寺爲北獄建康縣爲南獄並置立監平一又制常以三月侍中吏部尙書三公郎部都令史三公錄冤屈御史中丞侍御史蘭臺令史親行京師諸獄及治署理察囚徒冤枉

後魏昭成帝始制法令反逆者族其餘當死者聽入金馬贖罪殺人者聽與死家馬牛葬具以平之盜官物一備五私物一備十四部大人共坐王庭決詞訟無繫訊連逮之苦境內安之

道武既平定中原患舊制太峻命三公郎王德除其酷法約定科令季年被疾刑法濫酷太宗承之吏文亦深太武帝神廟中詔崔浩定律令除五歲四歲刑增一年刑大逆不道腰斬誅其同籍年十四以下腐刑女子沒縣官害其親者輶之爲蠱毒者男女皆斬女焚其家巫蠱者負殺羊抱犬沈諸泉當刑者贖負則加鞭二百畿內人富者燒炭於山貧者役於園溷女子入春藁其瘡疾不逮於人守苑囿王官階九品得以官爵除刑婦人當刑而孕產後百日乃決年十四以降刑之半八十及九十非殺人不坐拷訊不踰四十凡論刑者部主言狀公車鞠辭而三都決之當死者定案奏聞帝親臨問無異辭怨言乃刑之諸州囚大辟皆先獻報乃施行其後因官吏贖貨太延中詔吏人得舉告牧守之不法於是凶悖者求得牧宰之失乃貪暴於閭閻真君中以有司斷法不平詔諸疑獄皆付中書依經義論決初盜律贓四十足致大辟人多慢政乃減至三疋

太平眞君十一年誅司徒崔浩清河崔氏無遠近及范陽盧氏太原郭氏河東柳氏皆浩之親黨盡夷其族浩修國史標立石銘刊國記書事備而不典旣列在衢路往來行者以爲言浩及祕書郎吏以下並死浩之將誅也幽繫置之檻內送於平城南使衛士數十人搜其上呼聲嗷嗷聞於行路自宰司之被害未有如浩之酷者

正平中又命太子少傅游雅中書侍郎胡方回等改定律制凡三百七十條門房之誅四大辟百四十五刑二百

獻文帝太安中以士民多因酒致鬪及議國政乃設酒禁釀酤飲者皆斬之吉凶之會聽開禁有程日增置內外候官伺察諸曹及州鎮或微服雜亂於府寺間以求百官過失有司窮治訊掠取服百官臧滿二丈皆斬又增律七十九章門房之誅十有三大辟三十五刑六十二

孝文除口誤開酒禁故事皆斬裸形伏質太和初制不令裸形又令高閭修舊文隨例增減凡八百三十二章門房之誅十有大大辟之罪二百三十五刑三百七十七除羣行剽劫首謀門誅律重者止梟首

太和五年沙門法秀謀反誅詔曰法秀妖詐亂常妄說符瑞闡臺御史張求等一百餘人招結奴隸謀爲大逆有司科以族誅誠合刑憲但矜愚重命猶所不忍其五族者降止同祖三族止一門門誅止身帝勤於爲政尤重刑罰大刑多令覆鞠或囚繫積年羣臣頗以爲言帝曰滯獄誠非善治不猶愈於倉猝而濫乎夫人幽苦則思善故智者以囹圄爲福堂朕特苦之欲其改悔而加矜恕耳由是因繫雖滯而所刑皆得其宜時法官及州縣多爲重枷復以繩石懸於囚頸傷肉至骨勒以誣服帝傷之乃詔非大逆有明證而不疑辭者不得大枷

太和八年始班俸祿以十月爲始季別受之舊律枉法十疋義贓二十疋罪死至是義贓一疋枉法無多少皆死仍分命使者糾察守宰之貪者秦益二州刺史恆農李洪之以外戚貴顯爲治貪暴班祿之後洪之首以贓敗帝命鎖赴平城集百官親臨數之猶以其大臣聽在家自裁自餘守宰坐贓死者四十餘人受祿者無不跼蹐賂賂參絕然吏民犯他法者帝率寬之疑罪奏讞多減死徙邊歲以千計都下決大辟歲不過五六人州鎮亦簡十五年詔犯死罪若父母祖父母年老更無成丁子孫又無周親者仰按後列奏以待報著之令

宣武帝正始初尙書令高肇等奏曰杖之小大鞭之長短令有定式但枷之輕重先無成制請造大枷長丈三尺
喉下長丈通頰木各方五寸以擬大逆外叛自是枷杖之制頗有定準法例律五等爵及在官品令從第以上晉
當刑二歲免官者三歲之後聽仕降先階一等邢巒奏官人若有罪本除名以職當刑猶有餘資得降階而敘至
於五等封爵除刑若盡永既甄削便同之除名於例實爽愚謂自王公以下有封邑罪除名三年之後宜各降本
爵一等三及郡公降爲縣公公爲侯侯爲伯伯爲子子爲男至於縣則降爲鄉男五等爵者并依此而降至於散
男其鄉男散男無可降授者三年之後聽依其本品之資出身從之

文帝大統十三年詔自今應官刑者直沒官勿刑亡奴婢應黥者止亡罪

北齊神武秉魏政遷都於鄴羣盜起遂嚴立制諸強盜殺人者首從皆斬妻子同籍配爲樂戶其不殺人及贖
不滿五疋魁首斬從者死妻子亦爲樂戶小盜贓滿十疋以上魁首死妻子配驛從者流

文宣受禪後命羣官刊定魏朝麟趾格又議造齊律積年不成其決獄猶依魏舊式 自六年以後帝遂以功業
自矜恣行酷暴昏狂酗營任情喜怒爲大鑊長鋸剉碓之屬並陳於庭意有不快則手自屠裂或命左右擣嗽以
逞其意時僕射楊遵彥乃令憲司先定死罪囚置於仗衛之中帝欲殺人則執以應命謂之供御囚應三月不殺
者則免其死帝嘗幸金鳳臺受佛戒多召死囚編蓬蔭爲趨命之飛下謂之放生墜皆致死帝視以爲歡笑時有
司折獄又皆酷法訊囚則用車輻獨杖夾指壓踝又立之燒睼耳上或使以臂貫燒車釘旣不勝其苦皆致誣伏
七年豫州檢使白櫛爲左丞盧斐所劾乃於獄中誣告斐受金文宣知其姦罔詔令按之果無其事乃敕八座議
立按劾格負罪不得告人事於是挾姦者畏糾乃先加誣訟以擬當格吏不能斷又妄相引大獄動至千人多移

歲月然帝猶委政輔臣楊遵彥彌縫其闕故時議者竊云主昏於上政清於下

武成帝河清三年尚書令趙郡王叡等奏上齊律十二篇一曰名例二曰禁衛三曰戶婚四曰擅興五曰違制六曰詐欺七曰鬪訟八曰賊盜九曰捕斷十曰毀損十一曰廐牧十二曰雜其定罪九百四十九條又上新令三十卷大抵採魏晉故事其制刑名五一曰死重者輶之輶音患其次梟首並陳屍三日無市者列於鄉亭其次斬刑殊身首其次絞刑死而不殊凡四等二曰流刑謂論犯可死原情可降輶管百髡之投於邊裔以爲兵卒未有道里之差其有不合遠配者男子長徒女子配舂並六年三曰刑罪卽耐罪也有五歲四歲三歲二歲一歲之差凡五等各加輶六歲者加管百其五歲者又加管八十四歲者六十三歲者四十二歲者二十一歲者無管並鑕輪作左校而不髡無保者鉗之婦人配舂及掖庭織四曰輶有百八十六五十四十之差凡五等五曰杖有三十二十一十之差凡三等當加者上就次當減者下就次贖罪舊有金皆代以中絹死百足流九十二足刑五歲七十八足四歲六十四足三歲五十足二歲三十六足各通輶管論一歲無管則通輶二十四足輶杖每十贖絹一足至輶百則絹十足無絹之鄉皆準絹收錢自贖管十以上至死又爲十五等之差當加減次如正決法合贖者謂流內官及爵秩比視老小閹癡并過失之屬犯罰絹一足及杖十以下皆名爲罪人盜及殺人而亡者卽懸名注籍贖其一房配驛戶宗室則不注盜不入奚官不加宮刑自犯流罪以下合贖者及婦人犯刑以下侏儒篤疾殘廢非犯死罪皆訟繫之罪刑年者鑕無鑕以枷流罪以上枷杻械死罪者桁之桁戶反決流刑輶管者輶其背五十一易執輶人輶鞘皆用熟皮削去廉稜輶瘡長一尺管者管髡而不中易人杖長三尺五寸大頭徑二分半小頭徑一分半決三十以下者杖長四尺大頭徑三分小頭徑二分在官犯罪輶杖十爲一員閑局六員爲一殿平局

八頁爲一殿繫局十頁爲一殿加於殿者復計爲頁焉又列重罪十條一曰反逆二曰大逆三曰叛四曰降五曰惡逆六曰不道七曰不敬八曰不孝九曰不義十曰內亂其犯十者不在八議論贖之限是後法令明審科條簡要又敕仕門子弟常講習之故齊人多曉法律其不可爲定法者別制權令二卷與之並行後平秦王高麗彥謀反須有約罪律無正條於是遂有別條權格與律並行大理明法上下比附欲出則附依輕議欲入則附從重法姦吏因之舞文出沒至於後主權幸用事有不附者陰中以法綱紀紊亂卒至於亡

周武帝保定三年司憲大夫拓拔迪奏新律謂之大律凡二十五篇一曰刑名二曰法例三曰祀享四曰朝會五曰婚姻六曰戶禁七曰水火八曰興繕九曰衛宮十曰市廛十一曰鬪競十二曰劫盜十三曰賊叛十四曰毀亡十五曰違制十六曰關津十七曰諸侯十八曰鷹牧十九曰雜犯二十曰詐僞二十一曰請求二十二曰告言二十三曰逃亡二十四曰繫訊二十五曰斷獄大凡定罪千五百三十條其制罪一曰杖刑五自十五至五十二曰鞭刑五自六十至於百三曰徒刑五徒一年者鞭六十管十徒二年者鞭七十管二十徒三年者鞭八十管三十徒四年者鞭九十管四十徒五年者鞭百管五十四曰流刑流衛服去皇畿二千五百里者鞭百管六十流要服去皇畿三千里者鞭百管七十流荒服去皇畿三千五百里者鞭百管八十流鎮服去皇畿四千里者鞭百管九十流藩服去皇畿四千五百里者鞭百管百死刑五一曰磬二曰絞三曰斬四曰梟五曰裂五刑之屬各有五合二十五等不立十惡之目而重惡逆不道大不敬不孝不義內亂之罪也凡惡逆肆之三日盜賊羣攻鄉邑及入人家者殺之無罪若報讎者造於法造七而自殺之不坐經爲盜者注其籍唯皇宗則否凡死罪枷而羣流罪枷而梏徒罪枷鞭罪桎杖罪散以待斷皇族及有爵者死罪以下鑕之徒以下散之獄成將殺者書其姓名及其罪

於卒而殺之市唯皇族與有爵者隱獄其贖杖刑五金一兩至五兩贖鞭刑五金六兩至十兩贖徒刑一年金十
二兩二年十五兩三年一觔二兩四年一觔五兩五年一觔八兩贖流刑一觔十二兩俱役六年不以遠近爲差
等贖死刑金二觔鞭者以百爲限加笞者合二百止應加鞭笞者皆先笞後鞭婦人當笞者聽以贖論徒輸作者
皆任其所能而役使之杖十以上當加者上歲次數滿乃坐當減者死罪流藩服藩服以下俱至徒五年以下各
以一等爲差爲盜賊者及謀反大逆降叛惡逆罪當流者皆甄一房配爲雜戶其爲盜賊事發逃亡者懸名注配
若再犯徒三犯鞭者一身永配下役應贖金者鞭杖十收中絹一疋流徒者依限歲收絹十二疋死罪者百疋其
贖刑死罪五旬流刑四旬徒刑三旬鞭刑一旬限外不輸者歸於法貧者請而免之大凡定法千五百三十七條
其大略滋章條流苛密比於齊法煩而不要又初除復讎之法犯者以殺論帝又以齊之舊俗未改昏政賊盜姦
宄庶乖憲章其年又爲刑書要制以督之其大抵持杖羣盜一疋以上不持杖羣盜五疋以上監臨主掌自盜二
十疋以上盜及詐請官物三十疋以上主長隱五戶及丁五以上及地頃以上皆死自餘依大律由是漢詐頗息
焉

宣帝性殘忍暴戾自在儲貳惡其叔父齊王憲及王軌字文孝伯等及卽位並先誅戮由是外內不安俱懷危懼
其後荒淫日甚惡聞其過誅戮無度疏斥大臣又數行肆赦爲姦者皆輕犯法政令否塞下無適從於是又廣刑
書要制而更峻其法謂之刑經聖制宿衛之官一日不直罪至削除逃亡者皆死而家口籍沒上書字誤者科其
罪又作礮礮車以威婦人其決人云與杖者卽百二十云多打者卽二百四十名曰天杖帝旣酣飲過度有下士
楊文祐因歌曰朝亦醉暮亦醉日日恆常醉政事日無次鄭譚奏之帝怒命賜杖二百四十而致死後更命中士

皇甫猛又諷諫鄭譯又奏之又賜猛杖百二十是時下自公卿內及妃后咸加捶楚上下愁怨

隋文帝初令高穎等更定新律其刑名有五一日死刑二有絞有斬二曰流刑三有千里千五百里二千里應配者千里居作二年千五百里居作二年半二千里居作三年三曰徒刑五有一年一年半二年半三年四曰杖刑五自六十至於百五曰笞刑五自十至於五十而蠲除前代鞭刑及梟首輾裂之法其流徒之罪皆減從輕流役六年改爲五年徒刑五年改爲三年唯大逆謀反叛者父子兄弟皆斬家口沒官又置十惡之條多採齊之制而處有損益一曰謀反二曰謀大逆三曰謀叛四曰惡逆五曰不道六曰大不敬七曰不孝八曰不睦九曰不義十曰內亂十惡及故殺人獄成者雖會赦猶除名其在八議之科及官品第七以上犯罪皆例減一等其品第九以上犯者聽贖應贖者皆以銅代絹銅一觔爲負負十爲殿笞十者銅一觔加至杖百則十觔徒一年贖銅二十觔每等則加銅十觔三年則六十觔矣流千里贖銅八十觔每等則加銅十觔三千則百觔矣二死皆贖銅百二十觔犯法私罪以官當徒者五品以上一官當徒二年九品以上一官當徒一年當流者三流同皆比徒三年若犯公罪者加一年當流者各加一等其累徒過九年者流二千里自前代相承有司訊考皆以法外或有用大棒束杖車輻輳底壓踝杖枕之屬盡除之訊囚不得過二百柳杖大小咸爲之程而行杖者不得易人又敕四方辭訟而枉屈縣不治者令以次經郡及州至省仍不治乃詣闕申訴有所未愜聽搗登聞鼓有司錄狀奏之帝又每季觀錄囚徒常以秋分之前省閱諸州申奏罪狀後因覽刑部奏斷獄數猶至萬條以爲律尙嚴密故人多陷罪又敕蘇威牛弘等更定新律除死罪八十一條流罪百五十四條徒等千餘條定留唯五百條凡十二卷一曰名例二曰衛禁三曰職制四曰戶婚五曰廩庫六曰擅興七曰賊盜八曰鬪訟九曰詐僞十曰雜律十一曰捕

亡十二曰斷獄自是刑網簡要疏而不失於是置律博士弟子員斷決大獄皆先牒明法定其罪名然後依斷其後帝以用律者多致踳駁罪同論異詔諸州死罪不得便決悉移按覆事盡然後上奏取裁 帝性猜忌素不悅學既任智而獲大位因以文法自矜明察臨下恆令左右覘內外小有過失則加以重罪又患令史臧汙因私使人以錢帛遺之得犯立斬每於殿廷打人一日之中或至數四嘗怒問事捶楚不甚卽令斬之十四年尙書左僕射高潁理書侍御史柳或等諫以爲朝堂非殺人之處闕廷非決罰之地帝不納潁等乃盡詣朝堂請罪曰陛下子育羣生務在去弊而百姓無知犯法不息致陛下決罰過嚴皆臣等不能有所裨益乞自退屏以避賢路帝於是顧謂領左右都督田元曰吾杖重乎元曰重問其狀元舉手曰陛下杖大如指捶楚人三十者比常數百故多致死帝不懌乃令殿內去杖欲有決罰各委所由後楚州行參軍李君才上言帝寵高潁過甚上天怒命杖之而殿內無杖遂以馬鞭笞殺之自是殿內復置杖未幾怒甚又於殿廷殺人兵部侍郎馮基固諫帝不從竟於殿廷行決帝亦尋悔宣慰馮基而怒羣寮之不諫者也

開皇十三年改徒及流並爲配防

十五年制死罪三奏而後決

十六年有司奏合川倉粟少七千石命斛律孝卿鞫問其事以爲主典所竊令孝卿馳驛斬之沒其家爲奴婢鬻粟以填之是後盜邊疆者一斗以上皆死家口沒官十七年詔所在官人不相敬憚多自寬縱事難克舉諸有殿失雖備科條或據律乃輕論情則重不卽決罪無以懲肅其諸司屬官若有愆犯聽於律外斟酌決杖於是上下相驅迭行捶楚以殘暴爲幹能以守法爲懦弱 時帝意每尙慘急而姦回不止又定盜一錢棄市法聞見不告

者坐至死自此四人共盜一樓榜三人共竊一瓜事發即時行決有數人刳執事而謂之曰吾豈求財者耶但爲枉人來耳而爲我奏至尊自古以來體國立法未有盜一錢而死也而不爲我以聞吾更來而屬無類矣帝聞之爲停盜取一錢棄市之法帝常發怒六月棒殺人大理少卿趙綽固爭曰季夏之月天地成長庶類不可以此時誅殺帝報曰六月雖曰生長此時必有雷霆天道既於炎陽之時震其威怒則天而行有何不可遂殺之帝猜忌益甚臣僚用法尤峻御史以元正日不効武官衣劍之不齊者或以白帝帝謂之曰爾爲御史何縱捨自由命殺之諫議大夫毛思祖諫又殺之左領軍府長史考校不平將作寺丞以課麥迴晚武庫令以署庭荒蕪獨孤時以私受蕃客鵠鵠帝察知之並親臨斬決仁壽中用法益峻帝既喜怒不常不復依準科條時楊素正被委任素又稟性高下公卿服慄不敢指言素於鴻臚少卿陳延不平蕃客館庭中有馬屎又庶僕羶上樗蒲旋以白帝主客令與掌故皆坐棒殺而榜捶陳延殆至於斃大理寺丞楊遠劉子通等性愛深文每隨衙奏獄能順帝旨帝大悅並遣於殿廷三品行中供奉每有詔獄專使主之候帝之所不快則按以重抵無殊罪而死者不可勝計遠又能附楊素每於途中接候而以囚名目白皆隨素所爲輕重其臨刑赴市者莫不途中呼枉仰天而哭

煬帝卽位以高祖禁網深刻乃敕修律令除十惡之條開皇舊制疊門子弟不得居宿衛近侍之官先時蕭巖以叛誅崔君綽坐連庶人勇事家口籍沒巖以中宮故君綽緣女入宮愛幸帝乃下詔革前制令諸州犯罪赦戮之門周以下親仍令合仕聽預宿衛近侍之官大業三年新律成凡五百條爲十八篇詔施行之謂之大業律一名例二曰衛宮三曰違制四曰請求五曰戶六曰婚七曰擅興八曰告劾九曰賊十曰盜十一曰鬪十二曰捕亡十三曰倉庫十四曰廩牧十五曰關市十六曰雜十七曰詐僞十八曰斷獄其五刑之內降從輕典者二百餘條

其枷杖決罰訊囚之制並輕於舊是時百姓久厭嚴刑喜於寬刑後帝乃外征四夷內窮嗜欲兵革歲動賦斂滋繁有司皆臨時迫脅苟求濟凶憲章遐棄賄賂公行窮人無告聚爲盜賊帝乃更立嚴刑敕天下竊盜已上罪無輕重不待聞奏皆斬百姓轉相羣聚攻剽城邑誅罰不能禁帝以盜賊不息乃益肆淫刑又詔爲盜者籍沒其家自是羣盜大起郡縣官人又各專威福生殺任情矣及楊元感反帝誅之罪及九族其尤重者行轅裂梟首之刑或磔而射之命公卿以下齧其肉百姓怨嗟天下大潰

文獻通考卷一百六十六

鄒 陽 馬 端 臨 貴 興 著

刑考五

刑制

唐高祖入關除苛政約法十二條唯制殺人劫盜背軍叛逆餘悉蠲之

武德二年頒新格五十三條唯吏受贓詐冒盜府庫物赦不原凡斷屠日及正月五月九月不行刑

四年高祖朝錄囚徒以人因亂冒法者衆盜非劫傷其主及征人逃亡官吏枉法皆原之已而又詔僕射裴寂等十五人更撰律令大略以開皇爲準凡律五百麗以五十三條 唐之刑書有四曰律令格式律令者尊卑貴賤之等數國家之制度也格者百官有司之所常行之事也式者其所常守之法也凡邦國之政必從事於此三者其有所違及人之爲惡而入於罪戾者一斷以律律之爲書因隋之舊爲十有二篇一曰名例二曰衛禁三曰職制四曰戶婚五曰廩庫六曰擅興七曰賊盜八曰鬪訟九曰詐僞十曰雜律十一曰捕亡十二曰斷獄其用刑有五一日笞笞之爲言恥也凡過之小者捶撻以恥之漢用竹後世更以楚書曰扑作教刑是也二曰杖杖者持也可持以擊也書曰鞭作官刑是也三曰徒徒者奴也蓋奴辱之周禮曰其奴男子入於罪隸任之以事實之圖土而教之量其罪之輕重有年數而捨四曰流書云流宥五刑謂不忍刑殺宥之於遠也五曰死乃古大辟之刑也自隋以前死刑有五曰磔絞斬梟裂而流徒之刑鞭笞兼用數皆踰百至隋始定爲笞刑五自十至於五十杖刑五自六十至於百徒刑五自一年至於三年流刑三百一千里至於二千里死刑二絞斬除其鞭刑及梟首磔裂

之酷又有議請減贖當免之法唐皆囚之諸枷長五尺以上六尺以下頰長二尺五寸以上六寸以下共闊尺四寸以上六寸以下徑三寸以上四寸以下桎長六寸以上二尺以下廣三寸厚一寸鉗重八兩以上一斤以下長一尺以上一尺五寸以下鑱長八尺以上丈二尺以下 諸杖皆削去節目長三尺五寸訊囚杖大頭三分二釐小頭二分三釐常行杖大頭二分七釐小頭一分七釐笞杖大頭二分小頭一分半其決笞者腿分受決杖者背腿臀分受須數等拷訊者亦同笞以下願背腿均受者聽卽殿庭決者皆背受

太宗卽位以爲古者斷獄必訊於三槐九棘之下今三公九卿卽其職也乃詔死罪中書門下五品以上及尙書平議之 帝嘗覽明堂鍼灸圖見人之五臟皆近背鍼灸失所則其害致死歎曰夫筆者五刑之輕死者人之所重安得犯至輕之刑而或至死乃詔罪人毋鞭背

詔三品以上犯公罪流私罪徒皆不追身時引囚至岐州刺史鄭善果上曰善果雖有罪官品不卑豈可與諸囚爲伍乃詔自今三品以上犯罪不須引過聽於朝堂俟進止 致堂胡氏曰三品以上貴近之臣也大臣不欲與諸囚同引得待臣以恥之道矣然諸囚蒙引而貴近之臣反不見引設有誣陷冤抑欲面訴於君而止於朝堂無由自進其所失又多矣隋史萬歲實在朝堂而楊素以往謁東宮讒之朝堂雖近天子之居至是遠於萬里故太宗不欲使三品以上與囚同引者別引可也

二年詔長孫無忌房元齡等復定律令議絞刑之屬五十皆免死而斷右趾其後蜀王府法曹參軍裴弘獻又駭律令不便者四十餘事遂除斷趾法爲加役流三千里居作比古死刑殄除其半據有司定律五百條分爲十二卷於隋代舊律減大辟入流九十二條減入徒七十一條 既定免死斷右趾法帝又哀其斷毀支體謂侍臣曰